

二十四史九通政典類要合編

後漢

第七冊

鄭子齋

PDG

二十四史九通政典類要合編卷四十六

後漢八

選舉

賢良方正 博士弟子 孝廉 至孝 有道 淳厚實直 仁賢 茂才 四行 明經 計偕 將帥 耆儒 試尚書 試博士 童科 任子 公府選舉 公府辟除

州郡辟除 上計吏 聘處士 宣陵孝子

建武六年十月詔曰吾德薄不明寇賊爲害疆弱相陵元元失所永念厥咎內疚於心其勅公卿舉

賢良方正各一人

七年四月詔曰比陰陽錯謬日月薄食百姓有過在予一人公卿司隸州牧舉賢良方正各一人遣

詣公車朕將覽試焉

章帝建初元年詔曰朕以無德奉承大業夙夜慄慄而災異仍見朕旣不明涉道日寡又選舉乖實
俗吏傷人官職耗亂刑罰不中可不憂與昔仲弓季氏之家臣子游武城之小宰孔子猶誨以賢才
間以得人明政無大小以得人爲本夫鄉舉里選必累功勞今刺史守相不明眞僞茂才孝廉歲以
百數旣非能顯而當授之政事甚無謂也每尋前世舉人貢士或起畎畝不繫閭閻敷奏以言則文
章可採明試以功則政有異迹文質彬彬朕甚嘉之其令太傅三公中二千石二千石郡國守相與
賢良方正能直言極諫之士各一人

五年二月朔日有食之詔公卿已下其舉直言極諫能指朕過失者各一人遣詣公車將親覽問焉

其以巖穴爲先勿取浮華

和帝永元六年詔曰陰陽不和水旱違度思得忠良之士輔朕不逮其令三公中二千石二千石內郡守相舉賢良方正直言極諫之士各一人遣詣公車朕將悉聽焉帝乃親臨策問選補郎更安帝永初元年三月日有食之詔公卿內外眾官郡國守相舉賢良方正有道德之士明正術達古今能直言極諫者各一人

五年三月詔曰朕思得忠良正直之人其令三公特進侯中二千石二千石郡守諸侯相舉賢良方正有道術達於政化能直言極諫之士各一人及至孝與眾卓異者并遣詣公車朕將親覽焉

順帝卽位詔公卿郡守國相舉賢良方正能直言極諫之士各一人

漢安元年二月詔大將軍公卿舉賢良方正能探賾索隱者各一人

沖帝卽位詔三公特進侯卿校尉舉賢良方正幽逸修道之士各一人

桓帝建和元年四月京師地震詔大將軍公卿校尉舉賢良方正能直言極諫之士各一人

三年六月詔大將軍三公特進侯其與卿校尉舉賢良方正能直言極諫之士各一人

永興二年二月京師地震詔公卿校尉舉賢良方正能直言極諫者各一人

延熹八年正月日有食之詔公卿校尉舉賢良方正

永康元年五月詔公卿校尉舉賢良方正

並帝紀
以上通考並同

東漢舉賢良文學

魯丕

郡功曹舉遷議郎

申屠剛

蘇章

李法

爰延

崔駰

周燮

不就

劉瑜

荀淑 皇甫規

張奐

劉淑

劉焉

通考選舉考

右賢良方正

光武中興先訪儒雅四方學士雲會京師於是立五經博士各以家法教授凡十四博士太常差次總領焉建武五年乃修起太學稽式古典服方領習矩步者委蛇乎其中肅宗又詔高才生受古文尚書毛詩穀梁左氏春秋雖不立學官然皆擢高第爲講郎給事近署

儒林傳序

和帝永元十四年司空徐防以五經久遠聖意難明宜爲章句以悟後學上疏曰臣聞詩書禮樂定自孔子發明章句始於子夏其後諸家分析各有異說漢承亂秦經典廢絕本文畧存或無章句收拾缺遺建立明經博召儒術開置太學孔聖既遠微旨將絕故立博士十有四家設甲乙之科以勉勸學者所以示人好惡改敝就善者也伏見大學試博士弟子皆以意說不修家法私相容隱開生姦路每有策試輒興諍訟論議紛錯互相是非不依章句妄生穿鑿以遵師爲非義意說爲得理輕侮道術浸以成俗誠非詔書實選本意臣以爲博士及甲乙策試宜從其家法章句開五十難以試之解釋多者爲上第引文明者爲高說君不依先師義有相伐皆正以爲非五經各取上第六人論語不宜射策雖所失或久差可矯革詔書下公卿皆從防言

徐防傳

順帝陽嘉元年試明經下第者補弟子增甲乙科員十人

案前書儒林傳成帝末歲課甲科四十八人爲郎中乙科二十八人爲太子舍人丙科十二人

十人補掌故東京因仍順帝紀
舊制今更增各十人

質帝本初元年令郡國舉明經年五十以上七十以下詣太學自大將軍至六百石皆遣子受業歲滿課試以高第五人補郎中次五人太子舍人又千石六百石四府掾屬二署郎四姓小侯先能通經者各令隨家法其高第者上名牒以次賞進實帝紀

靈帝熹平五年試太學生年六十以上者百餘人除郎中太子舍人至王家郎郡國文學吏靈帝紀

右博士弟子

郡太守舉孝廉郡口二十萬舉一人百官志

故事尚書郎以令史以次補之光武始用孝廉爲尚書郎百官志

建武十四年詔三公舉廉吏各二人光祿歲察廉吏三人中二千石歲察廉吏各一人廷尉大司農

各二人將兵將軍歲察廉吏各二人百官志注

章帝建初元年初舉孝廉郎中寬博有謀任典城者以補長相章帝紀

和帝時大郡口五六十萬舉孝廉二人小郡口二十萬并有蠻夷者亦舉二人帝以爲不均下公卿

會議丁鴻與司空劉方上言凡口率之科宜有階品蠻夷錯雜不得爲數自今郡國率二十萬口歲

舉孝廉一人四十萬二人六十萬三人八十萬四人百萬五人百二十萬六人不滿二十萬二歲一

人不滿十萬二歲一人帝從之

丁鴻傳

永元七年四月詔曰舊典因孝廉之舉以求人有司詳選郎官寬博有謀才任典城者三十人既而悉以所選郎出補守相

十三年詔緣邊郡口十萬以上歲舉孝廉一人不滿十萬二歲舉一人五萬以下三歲舉一人

安帝元初六年詔光祿勳與中郎將選孝廉郎寬博有謀清白行高者五十人補令長丞尉

延光二年八月初令二署郎通達經術任牧民者視事三歲以上皆得察舉

順帝即位令郡國守相視事未滿歲者一切得舉孝廉吏

並帝紀

閏月丁亥令諸以詔徐爲郎年四十以上課試如孝廉科者得參廉選歲舉一人

順帝紀

左雄前議舉吏先試之於公府又覆之於端門尚書張盛奏除此科黃瓊復上言覆試之作將以澄

清洗濁覆實虛濫不宜改革帝乃止

黃瓊傳

二帝張衡言自初舉孝廉迄今二百歲矣皆先孝行行有餘力始學文法辛卯詔書以能章句奏案

爲限雖有至孝猶不應科此棄本而取末曾子長於孝然實魯鈍文學不若游夏政事不若冉季今

欲使一人兼之苟外有可觀內必有闕則違選舉孝廉之意矣

張衡傳

漢安元年尚書令黃瓊以前左雄所上孝廉之選專用儒學文吏於取士之義猶有所遺乃奏增孝

悌及能從政者爲四科帝從之

黃瓊傳

桓帝卽位詔曰孝廉廉吏皆當典城牧民禁姦舉善興化之本常必由之詔書連下分明懇切而所
在飭習選舉乖錯害及元元頃雖頗繩正猶未懲改方今淮夷未殄軍師屢出百姓疲瘁困於調發
庶望羣吏惠我勞民蠲滌貪穢以祈休祥其令秩滿百戶十歲以上有殊才異行乃得參選贓吏子
孫不得察舉杜絕邪僞請託之原令廉白守道者得信其操各明守所司將觀厥後

桓帝紀以
上通考同

陽嘉元年左雄上言孔子曰四十不惑禮稱彊士請自今孝廉年不滿四十不得察舉皆先詣公府
諸生試家法文吏課牋奏副之端門練其虛實以觀異能以美風俗有不承科令者正其罪法若有
茂材異行自可不拘年齒帝從之胡廣郭虔史敞上書駁之曰凡選舉因才無拘定制六奇之策不
出經學鄭阿之政非必章奏甘奇顯用年乖彊仕終賈揚聲亦在弱冠前世以來貢舉之制莫或回
革今以一臣之言剗戾舊章便利未明厭心不厭矯枉變常政之所重而不訪台司不謀卿士若事
下之後議者剗異異之則朝失其便同之則王言已行臣愚以爲可宣下百官參其同異然後覽擇
勝否許采厥衷帝不從辛卯初令郡國舉孝廉限年四十以上諸生通章句文吏能牋奏乃得應選
其有異才異行若顏淵子奇不拘年齒久之廣陵所舉孝廉徐淑年未四十臺郎詰之對曰詔書曰
有如顏回子奇不拘年齒是故本郡以臣充選郎不能屈左雄詰之曰昔顏回聞一知十孝廉聞一
知幾邪淑無以對乃罷却之

左雄前議舉吏先試之於公府又覆之於端門尙書張盛奏除此科黃瓊復上言覆試之作將以澄

清洗濁覆實虛濫不宜改革帝乃止

詔侍中尙書中官子弟不得爲吏察孝廉

徐氏曰按孝廉之舉始自西都嘗考元朔詔書云深詔執事興廉舉孝今或至闔郡不薦一人其與中二千石禮官博士議不舉者罪有司奏議曰不舉孝不奉詔當以不敬論不察廉不勝任也當免詳觀此文則孝之與廉當是各爲一科故蕭望之薛宣黃霸張敞等皆以察廉補長丞獨王吉京房師丹孟嘉皆以舉孝廉爲郎劉輔舉孝廉爲襄贛令至東都則合爲一科矣西都止從郡國奏舉未有試文之事至東都則諸生試家法文吏課牋奏無異於後世科舉之法矣西都未始限年至東都則年四十以上始得察舉矣黃瓊言左雄所上孝廉之選專用儒學文吏於取士之選猶有所遺乃奏增孝悌及能從政者爲四科則知當時雖以孝廉名科而未嘗責其孝行廉隅之實是亦失設科之本意也雖然漢世諸科雖以賢良方正爲至重而得人之盛則莫如孝廉斯亦後世之所不能及按西漢舉賢良文學則令對策而孝廉則無對策之事蓋所謂賢良文學者取其忠言嘉議足以佐國崇論宏議足以康時故非試之以對策則無以盡其材若孝廉則取其履行而非責其議論也今亦從而有所試焉則所謂孝廉者若何而著之於篇乎又況左雄所言諸生試家法謂儒有一家之學六藝專門之類文吏課牋奏則又文之靡者去賢良所對尙復遠甚而何以言孝廉乎雄又言郡國孝廉古之貢士出則富民宣協風教若其面牆則無所施用愚以爲眞孝實廉

之人豈有不學牆面之理而以家法牋奏應選者又豈可遽許以學古入官之事也然史言雄立此法之後濟陰太守胡廣等十餘人皆坐繆舉免黜唯汝南陳蕃潁川李膺下邳陳球等二十餘人得拜郎中自是牧守畏慄莫敢輕舉則知當時孝廉一科濫吹特甚於文墨小技尙未能精通固無問其實行也科以孝廉名而猶如此則其他可知王荊公詩言文章始隋唐進取歸一律安知鴻都事竟用程人物嗚呼其來久矣非始於隋唐也

許荆祖父武太守第五倫舉爲孝廉武以二弟晏普未顯欲令成名乃請之曰禮有分異之義家有別居之道於是共割財產爲三分武自取肥田廣宅二弟所得方少鄉人皆稱弟克讓而鄙武貪婪晏等以此並得選舉武乃會宗親泣曰吾爲兄不肖盜聲竊位二弟年長未豫榮祿所以求得分財自取大譏今理產所增三倍於前悉以推二弟一無所留於是郡中翕然稱之位至長樂少府

按此後漢初之事當時之所謂孝廉必取其實行稽諸鄉評譽望著者入選掄而聲稱損者遭擯棄故所舉大概皆得其人中葉以來此意不存往往多庸妄之流以干請而得之於是只得假試

文之事以爲革繆之法矣

以上通考選舉考

東漢舉孝廉

馬稜伏波族孫以郡功曹舉遷謁者

魏霸 韋彪

馮豹

賈琮

鄭弘

周章

張霸

桓典

桓鸞

劉平

江革

周槃

第五倫

鍾離意

寒朗

朱穆

徐防

張敏

胡廣

袁安

翟劭

霍譖

陳禪

龐參

陳邇

橋元

黃憲

楊彪

張綱

王龔

种暠

陳球

陳球

杜根 劉陶 李雲 傅燮 蓋勳 張衡不就 左雄 李固 杜喬 吳祐 延篤 段熲

陳蕃 李膺 劉祐 宗慈 巴肅 范滂 尹勳 蔡衍 羊陟 陳翔 檀敷 劉儒 賈

彪 符融不就 鄭太不就 荀彧 皇甫嵩 朱雋 劉虞 公孫瓚 袁術 許荆 第五訪

劉矩 劉寵 陽球 劉琨 張興 包咸 楊仁 董鈞 服虔 穎容 許慎 高龔 劉

梁 高彪 劉茂 張武 戴封 雷義 王烈 謝夷吾 李邵 公沙穆 華佗不就

長水校尉樊儵上言郡國舉孝廉率取年少能報恩者耆宿大賢多見廢棄宜敕郡國簡用良俊

种嵩始爲縣門下吏時河南尹田歆外甥王湛名知人歆謂之曰今當舉六孝廉多得貴戚書命不

宜相違欲自用一名士以報國家爾助我求之明日湛送客於大陽郭遙見嵩異之還白歆曰爲尹

得孝廉矣近洛陽門下吏也歆笑曰當求山澤隱滯近洛陽吏邪湛曰山澤不必有異士異士不必

在山澤歆卽召嵩於庭辨詰職事嵩辭對有序歆甚知之召署主簿辟太尉府舉高第

按東京選舉孝廉一科爲盛名士多出其中然以此一段觀之則濫吹者亦多如樊儵所言取年

少能報恩者固非矣若田歆庭詰种嵩而觀其辭對有序則謂之能吏可耳所謂孝廉豈於一應

對之頃而知之乎

以上通考選舉考

右孝廉

廉吏附

安帝永初五年舉至孝與眾卓異者

安帝紀

桓帝建和元年詔大將軍公卿郡國舉至孝篤行之士各一人

延熹九年詔公卿校尉郡國舉至孝

獻帝建安五年詔三公舉至孝二人九卿校尉郡國各一人皆上封事靡有所諱

徐氏曰按荀爽傳太常趙典舉爽至孝對策陳便宜靈帝詔舉有道之士而謝弼陳淳公孫度俱對策除郎中由是觀之漢世諸科皆有制策有司因以定其科第之等也

右至孝

安帝詔舉有道公卿百僚各上封事陳忠上疏言嘉謀異策宜輒納用若有道之士對問高者宜垂省覽以廣直言之路書御有詔拜有道高第士沛國師延爲侍中

陳忠傳

建寧二年舉有道之士謝弼與東海陳敦玄菟公孫度俱對策皆除郎中

謝弼傳

安帝建光元年令公卿特進中二千石二千石郡國守相舉有道之士各一人

靈帝建寧元年詔郡國守相舉有道之士各一人

范曄論曰漢初詔舉賢良方正州郡察孝廉秀才斯亦貢士之方也中興以後復增淳朴有道賢能直言獨行高節質直清白淳厚之屬榮路既廣缺望難裁自是竊名僞服寢以流競權門貴仕請謁繁興自左雄任事限年試才雖頗有不密固亦因識時宜而黃瓊胡廣張衡崔瑗之徒泥滯舊方互相詭駁循名者屈其短算實者挺其効故雄在尚書天下莫敢妄選十餘年間稱爲得人斯亦效實

之證乎順帝始以童弱反政而號令自出知能任使故士得用情天下喁喁仰其風采遂乃備元纁玉帛以聘南陽樊英天子降寢殿設壇席尚書奉引延問得失急登賢之舉虛降已之禮於是處士鄙生忘其拘儒拂巾衽褐以企旌車之招矣至乃英能承風俊乂咸事若李固周舉之淵謏弘深左雄黃瓊之政事正固桓焉楊厚以儒學進崔瑗馬融以文章顯吳祐蘇章种暹樂巴牧民之良幹龐參虞詡將帥之宏規王冀張皓虛心以推士張綱杜喬直道以糾違郎顗陰陽詳密張衡機術特妙東京之士於茲盛焉向使廟堂納其高謀疆場宣其智力帷幄容其謇辭舉措稟其成式則武官之軌豈其遠而詩云靡不有初鮮克有終可爲恨哉逮孝桓之時碩德繼興陳蕃楊秉處稱賢宰皇甫張段出號名將王暢李膺彌縫袞闕朱穆劉陶獻替匡時郭有道獎鑒人倫陳仲弓弘道下邑其餘宏儒遠智高心潔行激揚風流者不可勝言而斯道莫振文武陵墜在朝者以正議嬰戮謝事者以黨錮致災往車雖折而來軫方遘所以傾而未顛決而未潰豈非仁人君子心力之爲乎

以上通考選舉考

右有道

元初元年詔三公特進列侯中二千石二千石郡守舉淳厚質直各一人

安帝紀

陳忠上疏曰嘉謀異策宜輒納用若有道之士對問高者宜垂省覽以廣直言之路書御有詔拜有道高第士沛國施延爲侍中

通考選舉考

右淳厚質直

中興以後復增清朴有道仁賢獨行高節實直清白敦厚之屬左雄傳論

鄧太后納樊準言屢舉方正清朴仁厚之士樊準傳

右仁賢

舊制光祿舉三署郎以高功久次才德尤異者爲茂才四行黃琬傳

光祿舉四行吳祐傳四行敦厚實朴謙讓節儉也

鮑永舉秀才不應本傳按茂才西都本云秀才避光武諱改茂才

章帝建初元年詔曰茂才孝廉歲以百數章帝紀

建武十二年詔三公舉茂材各一人光祿勳歲舉茂材四行各一人監察御史司隸州牧歲舉茂材

一人四行謂清厚實樸謙遜節儉也

世祖詔方今選舉賢佞朱紫錯用丞相故事四科取士一曰德行高妙志節清白二曰學通行修經

中博士三曰明達法令足以決疑能按章覆問文中御史四曰剛毅多略遭事不惑明足以決才任

三輔令皆有孝弟廉公之行自今以後審四科辟召及刺史二千石察茂才尤異孝廉之吏務盡實

覈選擇英俊賢行廉潔平端於縣邑務授試以職有非其人臨計過署不便習官事書疏不端正不

如詔書有司奏罪名并正舉者

章帝時詔復用前漢丞相故事以四科辟士凡所舉士先試之以職乃得充選其德行尤異不宜試

職者疏於他狀舉非人兼不舉者罪

武帝因董仲舒之言立制故事在丞相府今復用之第一科補西曹南閣祭酒二科補議曹三科補

四辭八奏四科補賊決

以上通考選舉考

右茂才四行

章帝建初八年詔曰五經剖判去聖彌遠章句遺辭乖疑難正恐先師遺言將遂廢絕非所以重稽

古求道真也其令羣儒選高才生受學左氏穀梁春秋古文尚書毛詩以扶微學廣義興焉

章帝紀

順帝陽嘉元年以太學新成試明經下第者補弟子增甲乙科員各十人

順帝紀

實帝本初元年令郡國舉明經年五十以上七十以下詣太學自大將軍至六百石皆遣子受業歲滿課試以高第五人補郎中次五人太子舍人又千石六百石四府掾屬二署郎四姓小侯先能通

經者各令隨家法其高第者上名牒當以資賞進

實帝紀

靈帝光和三年六月詔公卿舉能通尚書毛詩左氏穀梁春秋各一人悉除議郎

靈帝紀

延光二年詔選三署郎及吏人能通古文尚書毛詩穀梁春秋各一人

元和二年令郡國上明經者口十萬以上五人不滿十萬二人

以上通考選舉考

右明經

明帝永平九年令司隸校尉部刺史歲上墨綬長吏視事三歲以上理狀尤異者各一人與計偕上

所舉之人命
與計吏偕上
明帝紀

安帝永初二年詔王主官屬墨綬下至郎謁者其明經任博士居鄉里有廉清孝順之稱國相歲移

名與計偕上尚書公府通調令得外補
安帝通考

右計偕

建光元年十一月詔三公特進侯卿校尉舉武猛堪將帥各五人
安帝紀

漢安元年十一月詔大將軍三公選武猛試用有効驗任爲將校者各一人
順帝紀

靈帝中平元年舉列將子孫及吏民有明戰陳之略者詣公車
靈帝紀

永和三年令大將軍三公舉故刺史二千石及見令長郎謁者四府掾屬剛毅武猛謀護任將帥者

各二人特進卿校尉各一人

左雄舉故冀州刺史馮直任將帥直坐贓受罪周舉以劾奏雄雄曰詔書使我選武猛不使我選清

永初五年詔三公特進九卿校尉舉列將子孫明曉戰陣任將帥者

安帝時三府任輕陳忠上疏曰今之三公雖當其名而無其實選舉誅賞不由尚書尚書見任重於

三公

高舉曰詔書使郡選武猛不使郡選貪汚也
以上通考選舉考

右將帥

永初二年詔公卿舉儒術篤學者大將軍鄧騭舉魯丕

皆丕傳

獻帝初平四年試儒生四十餘人上第賜位郎中次太子舍人下第者罷之詔曰孔子歎學之不講不講則所識曰忘今耆儒年踰六十去離本土營求資糧不得專業結童人學白首空歸長委農野

永絕榮望朕甚愍焉其依科罷者聽爲太子舍人

案吳曾云此卽累舉推恩之始

獻帝紀

順帝陽嘉元年除郡國耆儒十九人補郎舍人

二年又除京師耆儒年六十以上四十八人補郎舍人及諸王國郎

以上通考選舉考

右耆儒

安帝時尙書有缺詔將大夫六百石以上試對政事天文道術以高第者補之孫懿移病不試翟酺

對第一拜尙書

翟酺傳

右試尙書

太常卿一人每選試博士奏其能否

百官志

建武中太常選博士四人陳元爲第一

陳元傳

張元舉孝廉爲郎會顏氏博士缺元策試第一拜爲博士

張元傳

楊仁舉孝廉除郎太常上仁經中博士仁自以年未五十不應舊科上府讓選

漢官儀曰博士限年五十以上

楊仁

傳

建武七年朱浮上言舊事策試博士必廣求詳選爰自畿夏延及四方是以博舉明經唯賢是登學者精勵遠近同慕伏聞詔書更試五人唯取見在洛陽城者臣恐自今以往將有所失求之密邇容或未盡而四方之學無所勸樂凡策試之本貴得其真非有期會不及遠方也又諸召試皆私自發遣非有傷費煩擾於事也臣浮幸得與講圖讖故敢越職帝然之朱浮傳

章帝時所徵舉率皆特拜不復簡試士或矯飾謗議漸生乃詔曰夫鄉舉里選必累功勞今刺史守相不明眞僞茂材孝廉歲以百數旣非能著而當授之政事甚無謂也

時陳事者多言郡國貢舉率非功次故守職益懈而吏事寢疏咎在州郡有詔下公卿朝臣議大鴻臚韋彪上議曰夫國以簡賢爲務賢以孝行爲首孔子曰事親孝故忠可移於君夫人才行少能相兼孟公綽優於趙魏老而不可以爲滕薛大夫忠孝之人持心近厚鍛鍊之吏持心近薄二代所以直道而行者在其所以磨之故也士宜以才行爲先不可純以閥閱然其要在於選二千石二千石賢則貢舉皆得其人矣帝深納之

永初二年詔曰間者公卿郡國舉賢良方正遠求博選開不諱之路冀得至謀以鑒不逮而所對皆循尙浮言無卓爾異聞其有百僚及郡國吏人有道術明習災異陰陽之度璇璣之數者各使指變以聞二千石長吏明以詔書博行幽隱朕將親覽待以不次

冲帝永嘉元年尙書令左雄議改察舉法限年四十以上儒者試經學文吏試章奏胡廣駁之詔從